

Aban, TL Sai Nain Ba Asaun ConocoPhillips-Shell -- 2025 Hahú Faan Mina

Tempo Timor, 16 Abril 2019

Prosesu estudu husi Foreign Investment Review Board Australia (FIRB) ba sosa asaun ConocoPhillips no Shell termina ona.

Nune'e, prosesu transferensia pagamentu ba sosa asaun ne'e bele ezekuta ona ohin, Tersa (16/4) no aban, Kuarta (17/4).

"Projeitu taka orsida. Horisehik ho ohin ne'e delegasaun ita-nia iha Singapura para halo konklui projeitu ne'e. Hahú aban ne'e ita hola parte projetu Greater Sunrise nian ho 56%", dehan Primeiru Ministru, Taur Matan Ruak, iha Palásiu Prezidensiál Bairru-Pité, Tersa (16/4).

Nia hatutan, Governu sei halo esforsu tomak atu termina ona prosesu transfrensia ohin, Tersa (16/4).

Tuir Xefe Governu, iha tinan 2025 no 2026 ne'e Timor-Leste komesa faan ona mina, tuir mehi Governu nian, maibe preziza mos atu halo servisu makaas.



Projetu ne'e remata, Timor-Leste hola parte na'in ona no Timor GAP hola parte hanesan konsorsiu ba Greater Sunrise.

Naturalmente tuir mai ne'e sei halo atvidade preparativus para halo prosesu ne'e la'o ba oin, nune'e bainhira to'o iha ne'ebá tékniku sira mak sei fó informasaun detallu.

Prosesu transferensia loloos halo iha 16 Marsu 2019, maibe tanba iha fallansu tekniku entaun adia too ohin lora.

Xefe negociadór prinsipál ba asuntu fronteira marítima nomos hanesan representante governu TimorLeste, Kayrala Xanana Gusmão, ohin lora Tersa-Feira (16/04) Asina ona akordu ho companhia ConocoPhillips ho Shell. Ho nune'e Timor-Leste iha partisipasaun asaun maioria iha projetu Greater Sunrise.